

四庫全書

集部

欽定四庫全書

集部

吳都文粹續集卷三十六

七

詳校官庶吉士臣朱理

侍讀臣孫球覆勘

總校官進士臣繆琪

校對官主簿臣汪日贊

謄錄監生臣張鴻仁

欽定四庫全書

吳郡文粹續集卷三十六

明 錢穀 撰

橋梁

文學橋銘

黃士毅

魯鄒而降道為絕學千五百年起濂續洛寥寥閩派久
幾復絕再起滄洲教脩日揭無極二五在人一源故不
同地時生聖賢吳通上國公即游魯胡然歷世莫踵公
武覩跡亦昧吁方肇祠是用作記意嚴洒譏嗟予小子

世聞產吳敢誦所自滄洲之徒登橋而思刻銘述記期
我同心如水洊至能今後學本末易明偽行不作踵公
自今

文學橋在縣治東北子游巷口舊名言偃橋又名醋
庫宋慶歷五年錄事夏秀建國朝初里人陳貞重建
重建跨塘橋記
曹緯

琴川去京畿八驛而近境大壤平舟車走集東吳之望
邑也東吳澤國千涇萬瀆悠然逝隕然而皆渚於三

江浮於震澤縈帶而下至琴川分為五浦而後入于海
其經絡於闌閘之間旁注而側出者乃其一也舊有橋
曰跨塘凡迎肅朝廷之命令接勞四方之賓客摩肩總
轡憧憧於遠路者莫不由斯歲籥綿稔雨滂衝毀來往
患之邑人欲更為石梁久矣上之人獄訟是務踵武怙
視莫肯一屑意淳熙癸卯邑大夫魯公為政之明年也
歲物豐成閭里康阜縉紳父老合辭以請公曰衆之所
欲苟憚其勞是委民寄於草莽也其可乎然後鉅費夥

非號名能集要當以身先乃出公帑之餘為之倡於是
遠近士民靡不感動協議畢力克伸偉功故材不賦而
美工不發而多曾不踰時汜奏成績公謂是橋之新也
玉虹蜿蜒直縣數百步寔東西取道之首一境阡陌之
會名不可以不稱乃以邑之地名之曰琴川自公改斲
蒼珉結址盤固而高廣有加也登焉引目則千里在睫
晨霏夕靄春穠秋瘠征帆颺見飛鳥明滅瓌竒萬態間
見層出騷人高士過之心景宜會則停驂嘯傲躡步微

吟江山之樂自適於意之表雖簪纓之風臺月榭仙釋
之紆巖繚壑兼得之也真所謂處喧囂而接遐曠者歟
何向晦而今顯自非公之精誠逸韻其能經營裁畫之
如是邪且橋梁之興廢先賢以是觀人之政豈細事哉
子產以乘輿濟人於溱洧而孟子譏其惠而不知為政
公成梁於暇日民無褰裳濡軌之患過子產遠甚濟川
之功兆於此矣公天資純粹以文學世其家於書無所
不窺施於有政則應機立斷鈞隱察伏洞見精密而歸

於忠厚凡民五過麗刑錫笏授詞有至于庭者涉筆批
解而人無不得其情不以吏追民不以政為吏設施見
於日用者先定其規模而後從事庭廡肅如也至若通
漕渠而賈艦得以貿遷浚福山白茅二浦溉荒蕪為膏
腴興學校而子弟知為善之可樂若是者未易一二而
詳大凡天下勝處非人莫傳滁山之林泉以醉翁亭而
傳西湖之景物以蘇公隄而傳此橋以公之善政遂為
一方之超觀將振耀而傳無窮也邑人求文以識其事

公之治績赫赫不可掩何待覩縷哉蓋人之向慕傾戴而不足者非刊之金石無以垂不泯而慰後人之拳拳也故為之書吉州司理叅軍曹緯記

跨塘橋舊名信義在縣治直南宋淳熙十年縣令曾榮建

韓氏修造橋梁道路記

桑悅

天下之事成於義而敗於利義之為字一而已矣視之無形求之無跡頽字遇之巍巍翼翼曲路得之平平直

直城池傾圯有之則飭廩篋落窆值之則溢我為則勇
我戰則力大至為臣死忠為子死孝扶天綱立人極義
其可少之邪是故事以義成不犯五刑物以義得不勞
神力交以義結窶賤不絕甚矣哉天下不可無義也練
川之婁溪有故家子韓君珎字良玉寔魏國忠獻公後
平生讀書仗義年至六旬顧後無繼因慨然曰吾蓄之
富聚之則利散之則義可不為濟人計邪顧婁溪至邑
橋梁俱有未修民或病涉邑侯青城孫君璽以名進士

宰本邑政通人和百廢具興茲橋心懼煩民尚未之及
遂捐己資自韓涇新團涇譚涇周涇新漕涇袁涇俞項
涇莊涇孫涇為橋者俱以木易石足為久遠計共費白
金數百兩又造北門城隍橋及砌婁溪街三十丈皆垂
成初橋成孫侯申文欽差工部郎中傅公潮大加賞嘆
批答云一毫不預慨世俗之可憎九橋連修覩斯人之
獨異又曰與其厚之以幣孰若華之以文用旌尚義之
賢并作守錢之戒令侯備練帳俾縣教諭周成彰之以

詞併侑以羊尊侯親下其廬鼓樂前導輿從塞途光輝
滿路里巷之人無不榮之夫橋之成道路之修使出於
官所損不知幾家所刑不知幾人良玉以獨力成之於
鄉之人前無所損而後有益是豈易得也耶夫藏經有
曰積財不施者自己無分五家子有分今良玉以五家
之物為萬民之利所得不既多乎良玉素以乏嗣為憂
橋功之就即產一佳兒名錫有符孫侯昔日獎諭之言
他日見之成立而閱諸橋或期駟馬之過或詠青龍之

現必有待也余以文字為職業因為記其事即可勒之於石以垂永久

諸橋在嘉定縣

常熟縣新建迎春橋記

王宗錫

常熟縣治之東南路接崑山太倉為縣通衢舊有橋以木為之易於朽腐修理維艱自吾邑侯下車之明年政事以和即興廢舉墜凡學校城隍廟以至諸司公廨東南濟農諸倉悉一新之因念橋之頽圯行者病涉且慮

木之不能久也乃易以堅石申請於今總理河道工部
正郎傅公躍然曰此誠經久圖也即命以行於是名匠
計之仍命義民唐政侯珮瞿旭董理其事經始於弘治
己未六月十五日落成于十一月二十八日未幾橋即
巍然煥然如長虹駕空見者驚喜橋之麓多侯姓舊名
侯家橋邑中積歲迎春皆從大東門地頗近北外有觀
音堂甚卑隘不堪即事攷之節令春從東方來非北地
所宜况官吏師生糧塘里老以及通縣旄倪羣聚而觀

地不足容邑侯因易以東門總收倉場即事畢經行此
橋其地寬其方正父老歡呼咸曰百年因襲之弊一洗
而新之遂改名迎春橋傅公又曰此盛事也不可無言
以記其寔邑侯與諸僚佐謂予染指卜商之學徵言志
之竊惟鄭子產以乘輿濟人於溱洧孟子譏其惠而不
知為政若此橋之建舉之者邑侯也成之者傅公也二
君子存公平正大之體而有紀綱法度之施所以集此
數百年之事功不煦煦為仁煦煦為惠利澤及人真可

書也他如福山唐墅小山湖橋皆常熟要津舊悉傾圮
侯復次第鼎新均未有記亦缺典也茲併入記中以見
侯之惠澤如水行地豈特一橋一事已哉邑侯姓楊名
子器浙之慈溪人以名進士起家授知崑山高平常熟
三縣今應召而起大用有期傳公名潮江右新喻世家
奉命東南大典水利功業未量若治農官趙祥縣丞張
翰楊明主簿郝尚質董資皆能贊襄惟謹可以書矣嗚
呼後之視今亦猶今之視昔繼斯邑者尚當勿替引之

是為記

迎春橋在東門

利往橋記

錢公輔

出姑蘇城南走五十里民屋數百間葺然沙渚之上者
今吳江縣也東湖之流寔貫城之中隔限南北橫可以
渡者今吳淞江也隱然長虹截湖跨江便來濟往安若
履道者初作利往橋也橋本無有慶歷七年冬大理寺
丞知縣事李問縣尉王廷堅嗟邑民之陋鮮慕學者將

改立至聖文宣王廟侈大黌館以進延諸生呼富民譬
曉以奉釋氏不若助縣官興學民始聽且駭居一日心
曉意解歡然從命遂輸緡錢數百萬未幾詔禁郡縣不
可新立學二人胥與謀曰民既從財既輸矣倘不能作
一利事以便人吾何以謝百姓遂合傭傭工橋後興焉
東西千餘尺市木萬計聞者異之沮議百端不兩月功
忽大就即橋之心侈而廣之構宇其上登以四望萬景
在目曰垂虹亭並橋之兩涯各翼以亭而表橋之名於

其下使往而來者可指以稱曰此某橋也初縣城為江流所判民半居其東半居其西晨暮往來事無巨細必舟而後可故居者為不利縣當驛道川奔陸走者肩相摩櫓相接也卒然有風波之變則左江右湖漂泊無所故行者為不便及橋之成行者便而忘向所謂不便居者利而忘向所謂不利議者皆舌強不敢發噫賢人君子措一意興一役豈直為游觀之美登賞之樂哉往往有悅其景物清絕脫落人世者若居之利行之便則

茫乎其莫稱也。雖然湖光萬頃與天接，白洞庭薦碧雲，
烟戰清月秋風夏，罽滅埃斷牧謳漁吟，喑鳴間發榜聲，
棹歌嘔啞互引，後盼前睨千里一素是，亦有足樂焉。庭
堅之字曰世美，精敏沉毅，顧其胸中不止乎佐一邑李
丞仁厚通雅，喜其有能而信從之，視事幾數月，塗巷室
閭斬然一變，若是橋利大功，博可傳，可記者，餘固不可
以一二書也。余觀今世人平居燕議，時孰不欲求位以
伸道，試縻以一職，則曰職小位隘，吾無以伸，惟齷齪奉

法保己之不暇若世美盡力其任不以小隘自繫者余未之見也始則欲設庠序恢教本使民知堯舜周孔之尊及詔條尼之遂能合財力興功利為永久之便其周旋進退無一不中於道噫豈常人而能至哉世美余友也欲余之文以信本末余嘗學春秋太史氏法乃書曰慶曆八年六月二十八日蘇州吳江縣初作利往橋成

吳江州重建長橋記

袁楠

震澤東受羣川汪洋巨浸至吳江尤廣行地為南北衝

千帆競發駛風怒濤春激噴薄一失便利卒莫能制唐
刺史王仲舒築石隄以順牽挽宋慶歷八年邑宰李某
始建長橋由是各捨舟以途來往若織水嚙木腐歲不
一葺蓋為民病秦定元年冬州判張君顯祖始泚事曰茲
寔首政稽工程財莫知攸出當茂於民民有調役惟浮
屠善計度長衢廣殿瞬息以具吾語諸衆有獲廣濟僧
崇敬寔來敬言木為梁弗克支遠易以石其迄有濟參
知政事默古斯以督運至吳乃采其議周詢以籌首捐

資以勸敬復曰作事謀始不可不慎有善士姚行滿嘉
興人能任大工役必屈必委繪圖相攸經畫畢具咸服
姚議於是參政委郡守郭侯鵬翼後未興丞相達爾罕
公朝京師回道由吳江郡白橋議丞相曰吾必首倡即
捐萬緡而府縣士民相胥以勸平章高公貫乃由湖廣
江西來江浙乃屬張均俾終是工杜侯真來守是土亦
曰張之言然二年閏正月建橋明年二月橋成長一千
三百尺有奇捷以巨石下達層淵積石既高環若半月

為梁七十有二醜以剽悍廣中三梁為尺三百以通巨
舟層闢狡獬危石聳屨釐以文甓過者如席舊有亭名
垂虹周遭嵯峨因名以增榮觀焉是役也敬師鳩徒輸
財寔三之二贏財十萬復以為寶帶橋助姚總其綱張
均首議出于政事有脗合而是州興役見知于丞相誠
出大幸厥今運舟相聯驛使旁午咸曰丞相謀猷經遠
張均美績由是得書將永無極繫之以詩

茫茫禹甸昔隣于魚維四載功茲為具區有失其防群

噉噉曰維李侯構茲虹梁經始孔艱任負揚揚歲老
石泐臨履若驚張侯涖官飭我初政曰茲橋匪修涉者
益病召維耆老貨布莫竟相國之來六轡徐徐詢行審
宜以究以圖割其民錢俾民樂輸橋既成矣虹飛于江
千柱承宇群流迴砥儼予層城爛其軒窗張君籌思相
國成之彼清淨士式克承之千載永賴庸以銘之

吳江長橋銘

有序

釋大訢

泰定間鹽官海溢江浙故相托歡公憂之有禱於天竺

山謂予言比過吳江見僧作長橋不煩於官而工敏于
事吾以萬緡助之又閱諸郡志若橋井道路昔之人悉
委之僧豈僧有才智而不如耶吾以海患國糜其費民
竭其力閔己之勞而羨彼之有成功也予復之曰古之
繕修委之僧者非其才智有餘恐吏緣奸而工若賈不
盡得其宜故託之僧亦權宜爾且事有人力而成之者
有修諸人而仰成于天者是不可槩論也今言者方興
水利地道不寧公能用蓋公之言治以清淨使民自安

而何有于繕修哉公曰然既而政化大行言水利者亦
罷而海循故道矣中外望公如曹參以相齊者相天下
而公遽薨惜哉時公所見作橋者僧從雅師立總其後
崇敬率衆以給其費居士姚行滿任勞以終事叅政默
古斯州判張顯祖倡義以贊成之橋若干尺費若干緡經
始于泰定乙丑二月期年而成後九年州守德濟哈雅
作鉅閣奉觀音像于上以師立之徒永福居之復置田
以繼其食他日從雅求記於予以雅嘗從巾峰于天

目宜宏其教以拯夫三界之昏墊而為井為梁為筏之
諭且不可得况拘拘從事于木石哉雖然道無不在為
與無為中峰之教人如是崇敬敦篤好義度量廓然嘗
交于予予又受知於托歡公故追憶其語而記其事系
之以銘銘曰

國之食貨資於東南郵傳星馳朝吳暮燕萬艘千騎水
陸會同昔危而安今絕而通巖巖之石我礪我砥孰先
履之相君至止君之憂民如援其溺輔以吾道乃煦乃

翼天嗇其施天下痛之我心匪石敢負所知霖潦夜驚
鼉吟風作我安如山禪定寂若寂而恒用人躋壽域于
以闡教于以報國

重修垂虹橋記

錢溥

成化十有七年歲在辛丑暮春之初重修垂虹橋成橋
舊名長橋在吳江縣治東三里許泄太湖所瀦三郡六
縣之水注三江以入于海書所謂三江既入震澤底定
是也然水無所洩必有震凌之患人失其濟必有阻溺

之虞則是橋也定據兩浙八閩之衝驛使檄遞者在焉
南北興販者往焉蓋要地也橋袤千有餘尺下開七十
二洞跨鯨波之濶聳鰲背之峻人行其上第見洞庭諸
山出沒於烟霞縹緲之間而東馳諸海日夜不息此真
勝境也歷歲滋久崩墮日甚殆三之一行者病焉去年
冬巡按御史高唐劉公魁過而見之召其治縣者修之
工鉅費繁未易規復其邑有故義官屠歲之妻趙氏聞
之撫其姑遺孤承宗嘆曰而父積鉅資以貽汝兄弟今

汝兄弟已歿汝安能保其所有邪令孫壻周禋告于縣
曰幸毋黷于官毋擾于衆願自為之庶揚夫名于不朽
保幼孫于有成于是縣達于公公且喜曰以一發婦若
此非有烈丈夫志者不能宜令縣學官禮于其門獎勵
之蘇衛指揮楊端董治之周禋則稟趙以酬應之鳩材
庀工籌議克合乃出白金千餘兩經始於其冬不二月
盡復其舊煥然維新乃請於公願立石以記述公曰吾
聞春秋常事不書此修橋亦常事也奚容書獨以彼稱

丈夫者多保利獲義雖至死不悟而趙乃能之宜書以
為積而不散者之勸趙亦遣裡謝曰婦人無聞惟公巡
我東吳威聲義聞自足感人而興起焉非有所為而為
之也余乃嘆曰此乃一事而數善并焉公能使民以義
而加夫勸人之禮趙能捨財取義而存夫保幼之仁况
端與裡內外謀合上不負公之托下卒成趙之志皆得
牽連書之使後之有事于斯橋者寧不視以為勸乎詩
曰

諸水牙湊滙成具區靈潦泛溢東海是趨輦石為梁橫
亘天衢軒豁呈露罔測端倪垂虹中斷病涉艱虞繡衣
使者不言自孚感茲孀婦善保其孤一揮千金惟新是
圖塊塊修造廣袤範模龍翔虎伏玉砌金鋪工甫三月
雨霽虹舒勢控山湖秀紋堪輿檄奏書傳如履坦途如
矢斯直曾不少迂勒石告成有永不磨

長橋

王安石

三江五湖口地與天不隔日月所蔽虧東西渺然白漫

漫漫北斗浩浩浮南極誰投此虹蜺欲濟兩間阨中流
雜蜃氣闌楯相承翼初疑神所為滅沒在頃刻晨興坐
其上傲兀至中昃猶憐變化工不謂因人力今君持酒
漿談笑顧賓客頗誇九州物壯麗此無敵熒煌丹砂柱
璀璨黃金壁中間不慮始助我皆豪殖喟乎獨不可還
當采民力

同前

葉夢得

長橋跨空水瀰漫北望登天去無岸洞庭自湧東西山

驚濤忽起行人斷禹功十年在坤輿東南大浸惟五湖
如何狂瀾不少限鐵馬萬騎翻長驅

吳江長橋

王令

老匠鐵手風運斤一挾刃入千山髡明堂有柱不見用
此為炎地猶濟人西渚巨澤江海通陽侯屢溺驚濤風
當道獨能支險阻更東安得與天窮莫比垂天紳莫比
跨地帶渴龍乾死苦無鱗絕海失舟踏鯨背秦帝東游
逐仙跡系重肉多飛不得二州水隔不到山借得紫虹

千萬尺平時塵土埋英雄吾亦棄劍來游東欲觀水盡
朝宗海安得身乘破浪風為約他年可歸處獨倚闌干
不思去季鷹范蠡不足奇待吾為誦歸歎句

長橋

吳及

有客過津亭高歌願濯纓闌干聚烟碧波浪捲秋聲
蟬飲瀟湘渴龍游河漢橫夕陽看不厭待看月華生

夜泊垂虹

孫元京

蟬蛻無晴雨橫空不計年長身欺浪渺鉅力厭風顛懷

古方聞笛題詩且住船飛鳴中夜雁何處得洲眠

月下游松江垂虹亭登長橋夜泊南岸口且游
寧境禪院因成十絕呈君勉且寄子通

朱長文

綵衣幾度醉江濱今日重來淚滿巾惟有舊詩存屋壁
豈知投老負垂綸

前哲臨流猛拂衣身違憂患是先機非才自合居閒曠
不泛五湖何處歸

雲動鑑中雙槩飛
天圍林外片帆歸
闌干倚遍日欲暮
坐看丹霞生翠微

人爭軒冕安在哉
我愛烟霞歸去來
魯望有靈還見笑
更回城闕戀塵埃

兩山映日磨蒼玉
萬頃涵虛皺碧羅
不會樂天猶近俗
謾將弦管雜烟波

長虹穩卧碧江心
夢寐頻游覺莫尋
歡友相逢清絕處
酣歌一夕抵千金

漠漠秋烟冪故園
沉沉暮色暝漁船
月華未出詩翁遠
樂事人間少十全

銀潢倒瀉入滄溟
身近魚龍夜不驚
鳴榔飛空孤雁過
漁燈照浦一星明

僧舍蕭疎竹葦間
開軒處處面雲山
詩家不及禪家樂
坐卧湖光百慮閒

江裏鱸魚味不羶
江頭酒美滑如泉
長橋為席雲為幕
祇欠洪崖笑拍肩

同楊立之步月垂虹因寄章蘇州

沈典永

萬頃澄江白玉寒
金波留影動波瀾
明時難賦離騷事
獨墊綸巾夜倚闌

踏翻鰲背步徘徊
萬里青山一鑑開
欲醉餘醅弔清影
自憐非是謫仙才

斑葉愁隨晚葉凋
天涯牢落一身遙
憑君莫惜松陵月
且借江邊照寂寥

舟過垂虹

何應龍

垂虹橋下水連天一帶青山落照邊三十六陂烟浦冷
鷺絲飛上釣魚船

過垂虹

姜夔

自作新詞韻最嬌小紅低唱我吹簫曲終過盡松陵路
回首烟波十四橋

長橋玩月

陳遠

世間八月十五夜何處樓臺得月多不及吳江橋上望

水晶宮殿揖嫦娥

長橋

張元

雲收霧霽水風高
百丈虹橋氣勢豪
疑是玉龍藏爪距
潛來江上看波濤

萬頃平湖水接天
湖光天色遠相連
虹蜺截雨歸未得
橫在波心幾十年

記得當年過此橋
月明江上暑風消
而今重到經行處
空有湖光伴寂寥

垂虹晚望

僧晦巖

老眼青青望洞庭，虹垂斷岸月初生。
滔滔橋下無情水，不為吳王洗甲兵。

垂虹橋

沈清女

晚來移棹泊垂虹，閒倚篷窗問釣翁。
為甚鱸魚低價賣，年來朝市怕秋風。

長橋

揭希韋

雙虹鎖湖湖水長，影搖洞庭吞三湘。
霜飛八月橘柚熟。

我欲打船聞水香
晴天晚眺過湖曲
歷歷遠樹波茫茫
客中有懷不得盡
無人同上三高堂

垂虹感慨

葉廣

垂虹橋頭浪如雪
新築層城堅勝鐵
長隄十里土花青
盡是吳儂戰時血
孤兒拾薪臨水渚
學得楚歌并楚語
仰觀飛矢在浮圖
江水江雲駛如雨

松江長橋

陳孚

松江波萬頃
橋倚碧雲端
白鳥穿屏小
青天落鏡寒
夕

陽明佛塔秋色老漁竿無限憑闌意何時此掛冠

垂虹晚坐

成廷珪

長橋戎馬後旗幟尚紛紛吳越東西隔江湖左右分荒
哉皮學士去矣范將軍誰種千頭橘空山卧白雲

題垂虹亭

王逢

長虹垂絕岸形勢壓東吳風雨三江合梯航百粵趨葑
田連沮洳蛟室亂魚鳧私怪鴟夷子初心握伯圖

長橋

薩都拉

挿天蟠煉勢嵯峨截斷吳淞一幅羅江北江南連地脈
人來人往渡天河龍腰撐出漁舟去鰲背高駝駟馬過
橋上青山橋下水世人能見幾風波

吳江長橋

李坦之

架木為梁若路平朱闌步步接空明江湖日夜流虹影
城郭東西隔水聲賈舶聚橋朝作市戍樓撾鼓暮歸營
三高祠畔垂楊柳撩亂春風弔古情

吳江石橋新成

宋无

五色何年補次寥百弓無地架瓊瑤老龍千尺卧寒玉
雌霓半空橫綵綃天路行看星象逼江濤怒息水犀鷁
騎鯨便欲超銀漢直踐台階挹斗杓

垂虹眺望戲作出入韻

高文度

左右江湖雜帶地天開圖畫信英雄吳松潮漲天為岸
林屋山高雲是峰上下炊烟生紫翠去來帆影亂空濛
闌干不厭頻來倚要豁平生芥蒂胸

垂虹

富恕

坤軸東南圻兩端巨靈擘華壓平川玉鯨偃蹇吞三峽
彩影連蜷落九天有客吹簫明月下何人釀酒大江前
闌干三百風烟晚獨立蒼茫歌洞天

同前

鈕麟

老龍天半倚高寒氣壓三吳控百蠻江海水聲吞合璧
東南地圻鎖連環玉闌憑月天應近石洞藏雲夜不關
老我一雙題柱手釣鰲猶在五湖間

垂虹中秋對月

蘇舜欽

月晃長江上下同畫橋橫截冷光中雲頭焰焰開金餅
水面沉沉卧彩虹佛氏解為銀色界仙家多住月華宮
地雄景勝言不盡但欲追隨乘晚風

垂虹亭詞

蘇軾

飛梁壓水虹影澄清曉橘里漁村半烟草嘆今來古往
物換人非天地惟有江山不老雨中風帽四海誰知
我一劍橫空幾番過接玉龍未斷月冷波寒歸去也林
屋洞關無鎖認雲屏烟障是吾廬任滿地蒼苔年年不

掃

垂虹橋

劉斯立

路隔橫臨鳥倦飛行人恐犯女星機
長虹出浪無冬夏老蜃浮空半是非
兩岸履聲雲內合三州帆影月邊歸
關干獨立秋風早豈待鱸魚始拂衣

同前

林景熙

地坼東吳海脈連畫橋兩道跨晴川
彩翻河漢蛟龍國勢壓江湖蠓螋天
幾處征帆浮日月四州譙角隔江烟

三高遠矣荒祠在一笛閑干夕照邊

同前

蘇轍

六月長橋斷不收朱闌初喜映春流虹腰宛轉三百尺
鯨背參差十五舟入市樵蘇看絡繹歸家鹽酪免遲留
病夫最與民同喜卯酉忽忽無復憂

長橋

華翥

何人拔起蒼山根挾來壓住江流奔三四百尺斷虹影
七十二灣新月痕玉闌雨過蒼苔滑石洞舟行清水渾

幾欲臨風又題柱恐驚司馬未招魂

泊垂虹

顧憲輝

三江之水太湖東浪激輕舟疾若風
白鳥羣飛烟樹末青山都在雪花中

垂虹橋下新水生白龍廟前雪未晴
大風挾帆過江去驚得沙鷗嘎嘎鳴

江風吹帆忽數里野花笑日時獨行更須對雪開金盞
要聽隣船搗玉筍

次韻

郊韶

洞庭之西湖水東客行三日上江風行行塞雁青天外
箇箇輕鷗白浪中

江上日日客愁生今朝春雪始放晴舟人捩拖看山影
驚起中流鷺鶴鳴

鷓鴣鷓鴣總多情蕩漾春江取次行日日沙頭候歸雁
為郎彈得小秦箏

次韻

陳基

旭日初生積水東
白頭波起鯉魚風
洞庭西望平如掌
七十二峰圖畫中

無限客愁撩亂生
春寒強半雨初晴
烟波萬頃深無底
彷彿鮫人織杼鳴

誰是岑參兄弟情
好奇長作漢陂行
如今翻動江湖興
月滿樓船聽按箏

垂虹

出郭雨如注入舟
天欲低飛染跨雲
渚嶼亘長霓三

江風水急五湖烟月迷
夙昔鷓夷子扁舟此入齊

次韻泊舟垂虹倡和

何年伐木架危橋
鯨浪翻空白雨飄
勢控三吳虹倒影
氣吞七澤水通潮
重淵有怪犀難照
蔓草無名火不燒
伯國黃金聞鑄像
王門白玉想為標
功成海上身先退
膾熟江東興可邀
歲月幾何流水逝
山川如舊古人遙
鴻飛矰繳何由慕
鶴去樊籠不可招
浩蕩扁舟歸鑑曲
寂寥方丈似中條
越人尚以雞為卜
楚俗相傳鵬類鴉

自把文章論隱伏敢將交態較淳澆五湖烟景隨時異
萬里風萍觸處漂却憶春暉樓上去為君裁取玉為簫

垂虹

高啟

行人脚底響波濤驅石神鞭是孰操影落蛟龍朝窟暗
形垂蝮蝮暮天高烟中去憶鷓夷遠月下吟誇長史豪
幾度憑闌賞秋色鱸魚新買繫歸舸

長橋

陶振

道人置立半通仙鞭石平湖棹巨川畫鏤玉環輪影缺

夜開金鏡月華圓萬邦冠冕行鼇背三島神仙出洞天
最是晚來烟雨後浪花堆裏看龍眠

垂虹夜月

周忱

清波卧長橋深潭漾華月肅肅夜景澄微微天籟發幽
人亭宇間鈎簾坐清絕

泊舟垂虹橋

劉珏

買酒烹鱸敵暮寒垂虹橋上倚闌干行人笑指詩翁嬾
不向城中訪縣官

長橋晚興

吳頤

垂虹橋下波濤壯人在鼉鼉背上行落日帆檣迴水驛
春風鼓角動江城鮫人織杼潛蛟泣戍卒彎弓過鳥驚
七十二峰波浪碧卧聽仙客紫鸞笙

垂虹橋

杜庠

天垂蟒螭跨三吳橋上分明見畫圖七十二灣平作路
萬千層浪直衝湖石闌干外青山小蘆葦叢邊釣艇孤
老我昔年題柱手舉杯今日醉尊鱸

舟泊垂虹

吳一鵬

溪亭踈爽枕平波避暑初從此地過高塔風霜僧院古
太湖烟水釣舟多試烹蓴菜知佳甚欲采蘋花奈晚何
清玩茗杯成久坐月明隨處起吳歌

過長橋

朱寔昌

浪起秋風萬頃花吳江一望太湖賒子胥謀畧原仇楚
張翰功名尚憶家廟倚虹橋長卧水舟搖月棹遠侵沙
不堪夜靜鳴孤鶴坐看牽牛憶歲華

秋夜長橋遣興

周仲仁

長橋秋夜月華清
共坐江頭楓樹鳴
渺渺金波來萬里
涓涓玉露落三更
隔舟漁火明還滅
傍晚山雲斷復生
張翰扁舟何處是
高歌尊酒一含情

垂虹晚眺

吳復

水落沙明露遠洲
楚天萬里見飛鷗
橫空瑞氣張華劍
浮世功名范蠡舟
落日樓臺吹笛晚
高風木葉下林秋
青冥共展圖南翼
肯學馮唐嘆白頭

夜泊垂虹聞笛

謝常

翦得柯亭碧玉枝誰家哀怨隔江吹
玉關風急飛霜早
銀漢雲橫月上遲停杼想應鮫淚滴倚闌聽斷雁聲悲
梅花一夕冰肌瘦堪竝愁人獨立時

垂虹亭

孫覲

宛宛白虹貫層梯出雲半乘雲來帝旁立侍玉皇案銀
河經千里水接天漫漫一杯屬明月俯見人影亂張公
江海客坐嘯白鷗伴寥寥如清風一笑亦可喚明朝駕

我軒挿羽流白翰行矣且勿驅來怪安石緩神光射斗
南絢若金碧爛出門問何祥銅章付雷煥

同前

陳瓘

三年為吏住江濱重到江頭照病身滿眼碧波輸野鳥
一蓑疎雨屬漁人隨船曉月孤輪白入座羣山數點春
張翰英靈應笑我綠袍依舊惹埃塵

同前

米芾

斷雲一葉洞庭帆玉破鱸魚霜破柑好作新詩寄桑苧

垂虹秋色滿東南

同前

陳珪

高壓玉龍腰參差雁勢朝雄吞五湖濶平揖兩山曉
闌檻中流出炎蒸白晝消暫來塵慮息那復日逍遙

夜宿垂虹亭舟中有感

龐元英

離家無數里客思便侵凌久撥爐無力頻翻被有稜孤
蟾如得伴哀雁擬傷增怪底寒清冽推篷露氣凝

垂虹亭

楊絳

垂虹臨絕景仙隱寄人間遠水平吞野歸雲補斷山空
明寬眼界透迴破天慳深羨鷓鴣夷子扁舟竟不還

和韻

陳武子

行樂江亭上情彌天壤間舟譏王訪雪妓鄙謝登山佳
致輸公擅清歡愧爾慳賓僚陪宴笑典盡莫輕還

同前

祝又

冷浸三江碧青園四面山帆歸烟浪杪人住水雲間風
颭波聲碎虹垂雨意閒無端動歸興一棹喜輕還

垂虹亭

陳直卿

西望洞庭突兀東連仙里人家笑指闌干三百醉來就
此乘槎

同前

蘇舜卿

氣象清雄天與鄰世間不合有埃塵擬將琴酌酬佳節
只恐江山解笑人

同前

丁謂

悠悠風物四時新冉冉山屏萬古春多少江山人不看

却來江上看行人

同前

錢明逸

千里波平瑟瑟風
纖雲不解翳虛空
素娥自有清光在
上下清明一鑑中

同前

李定

一夢江湖三十年
青山隱隱水漫漫
當時把酒誰人在
回首重來獨倚闌

同前

王琪

紅橋跨浪二千尺，橋上危亭在水心。
六月火雲燒萬里，夜來風細似秋深。

同前

王恂

長橋千步截江洄，虹影隨波綵翠開。
誰與上皇傳信息，定從此路入蓬萊。

夜泊吳江宿垂虹亭

戴良

閃閃練月宵稜稜，素秋節捨棹上孤亭。
臨江候歸客，佳人殊未來，幽意為誰適。
徘徊當夜半，彷彿去天尺，仰接

銀河橫俯照星緯逼直疑穹壤連豈有人世隔飄飄形
若蛻眇眇思何極居然怯風露聊復就衾席亦既不成
寐將何慰茲夕賴有同心人連牀語疇昔

垂虹亭

無名氏

石橋翊翊如游龍上有亭予名垂虹飛梁橫跨碧波上
砥柱屹立洪濤中氣吞具區三萬頃目覽洞庭七十峰
巖巖顯伏固非一江湖合勢遙相通醒心豐樂昔稱勝
斯亭直與之相雄前年烽火亭燒燬劫灰徒逐東流水

此邦壯觀已蕭條喜有孔侯復經始侯家清白素王孫
葺舊補殘有倫理棟宇翬飛洲渚間窻扉輪奐烟雲裏
廟貌三忠自侯建遺像肅然人敬企邦人士卒共樂成
鼓舞歌詩頌侯美從今過客踏靈鰲盡說登臨氣象豪
秋水芙蓉翻錦浪寒汀落日散金濤風帆沙鳥近隱見
烟雲竹樹森相交個中景物吟不足空對山川送游目
停杯聽我歌此曲并刀快剪吳淞綠

垂虹亭

倪瓚

虛閣春城外澄湖暮色邊飛雲忽入戶去鳥欲窮天林
屋青西映吳淞碧左連登臨感時物快吸酒如川

垂虹晚眺

柳貫

山光自獻一螺青人立垂虹酒乍醒兩界星河涵倒影
千家樓閣載浮萍欹檣側枕衝風勁密網疎罾刮浪腥
正是鱸魚忘世味隨方我亦且簞箬

題垂虹亭

劉致

海神鞭石架穹窿突兀虛亭瞰碧空藻井動搖天上下

彩虹拖沓水西東貫通百粵連吳會流接三江究禹功
周道於今坦如砥梯航喜與萬方同

垂虹亭秋日遣興

宋无

滿袖玉皇香案烟綵蛺背上眺晴川紅黃霜樹珊瑚海
黑白雲光玳瑁天玄圃空離樓十二玉墀對罷字三千
吟毫醉蘸吳江水寫與騎鯨李謫仙

垂虹亭

僧仁裕

珉珉陸續楚連蠻底定狂瀾萬馬還水府有門容棹入

洞天無鎖許誰關
高空勒住黃金索
滄海浮來碧玉環
月夜江樓看蝮蝮
長虬橫卧翠濤間

同前

周密

水國生涯一釣綸
荻芽鱸膾四時新
安知白首滄洲客
不是三高行輩人

岸草江花萬古春
感今懷古最傷神
不知一片垂虹月
照却憑闌幾許人

同前

李繼本

金尊綠酒蕩晴空
花壓雲鬟舞袖紅
莫唱何戡渭城曲
銀箏嗚咽怨秋風

同前

高啟

泊舟登危亭
江風墮輕幘
空明入空眺
天水如不隔
日落震澤浦
潮來松陵驛
綿綿洲渚平
莽莽葭葭積
憑闌不敢唾
下有龍窟宅
帆歸雲外秋
鳥下烟中夕
欲炊菰米飯
待月出海白
喚起弄珠君
閒吹第三笛

同前

周南老

虛亭架垂虹宛在水中吐江湖界左右闌檻俯清泚踈
簾動秋碧遙山凝暮紫憑虛際空濶應接殊未已漁歌
忽互答聲落烟波裏扁舟去遥遥可是鷓鴣子

垂虹橋在吳江縣東門外一名利往又名長橋宋慶
厯八年縣尉王廷堅以木為之東西長千餘尺中有
垂虹亭治平三年知縣孫覺重修至紹興間邊軍犯
淮有建議焚橋者郡守洪遵持不可而縣民亦相與
聚泣圮下不可焚遂止元泰定二年判官張顯祖復

甃以石下開七十二洞國朝洪武元年知州孔克中
正統元年巡撫侍郎周忱相繼修治成化十七年重
修

仙里橋

張明達

蓬島徒遼遠瑤池更渺茫波間有林屋只是此仙鄉
在縣治東世傳陳昉于此仙去故名下有仙人洞

庶寧橋

比屋連甍棟居民庶且寧早來漁市散終日敗鱗腥

在縣治右元初改州又稱州橋

大明橋

劉嘉謨

東望扶桑路迢迢幾萬程
滄浪將盡處忽見日華生

萬頃橋

巨浸莽無極聊為萬頃看
世無黃叔度君試倚闌干

定海橋

昔日松江上潮翻定海來
而今舊橋水不到半江回

甘泉橋

倪瓚

松陵第四橋前水風急猶須貯一瓢
敲火煮茶歌白苧
怒濤翻雪小停橈

吳江第四橋阻風

王逢

虹梁雪灘光明滅風著岸脅水鱗生空郵天晚亂木葉
太湖日寒多雁聲馬周斗酒足自慰龜蒙扁舟有餘清
囊中青錢不滿百聊買小鮮來就烹

又名第四橋其下水甚清冽在水品第四

新建大有橋記

朱存理

吳江縣治之東四十餘里地名莘塔旁有橋歲久傾圮
舊址僅存里人凌通慨行者之病涉也思欲新之而力
有不逮乃告于鄉之巨室冀助成厥志承事郎周君惟
敬慨然捐資助之其妻之祖母趙氏妻母周氏素皆好
施聞之亦樂助焉趙嘗以白金千兩修縣城之垂虹橋
義聲滿邑雖厚積而人以為難今茲舉也若易易然者
凌君遂市石鳩工始於秋七月乙酉落成於九月壬午
請予易其名復徵文為記予適至其所秋風澤國黃雲

滿野得覩大有之年歡呼笑語聞于疆畝蓋樂斯橋之成也因名之曰大有期以為歲之兆也衆以為然又以為其鄉人之慶也鄉人之相率助君事欲堅久故君督視惟謹而功頗大所費出自君無吝宜其歸功於君誠為義舉也已予雖不文恐後人昧于興創之由故鏡石以記成化甲辰十月朔長洲朱存理性甫記并書篆

重建獬豸橋銘

吳洪

吳江尹侯陳君秉鈞來涖吾邑之三年政平而人愛悅

邑衙之前有橋名州橋久圯行者病之侯乃以豐歲勸衆有力者為之民不勞而功倏成惠于民也寔多其橋名未易也成化癸卯五月六日夜風雨交作侯二鼓就寐夢神衣冠偉然揖而進曰子為斯邑令一下車民無凍餒百廢具修是橋之建為民千祀之利也但橋名當易也吾為子告焉子嘗覽郡志乎是邑儀門舊有亭名獬豸廢久而名存子以斯亭名名橋不亦美乎侯答曰獬豸乃神羊能觸邪古人取以為御史章服之飾是邑

鴻碩顯榮之多將兆于茲也神人聞之大笑而去侯覺
驚異筆其說以書來京屬予銘之予邑人也知侯為詳
侯以鄉貢進士除是官有清白操毅然有為人不可干
志在為民省力屢遇威權不少避侯之大節不可及矣
士論偉之咸以遠大望侯也況今聖天子簡賢任使凡
在郡邑有異能者悉詔補侍御侯之建橋而神假夢如
此固為吾邑之禎侯之超遷將先兆於茲乎神之靈不
妄也今特為銘以鏡諸石使後人知是橋之名由茲而

立是橋之建由侯而始侯之澤茲邑將與橋同久矣肇
工於成化十八年十二月畢工於成化十九年三月侯
名秉鈞字堯弼銘曰

猗歟吳江鉅於吳東陳侯之來憂民若恫室家胥悅歲
屢獲豐乃鑿白石乃建飛虹民不告勞千夫卒從神乃
假夢話言從容有亭獬豸載郡志中乃為神羊一角如
龍無邪不觸無佞不攻易以名橋足振儒風侯乃稽首
禎兆是崇橋由此名云云朝宗乃期是邑俊髦烈轟致

身執法接武登庸孤忠直節咸躋於公我侯超擢兆先
此逢神之嘉茲亦因有窮

登平望橋作

顏真卿

登樓試長望望極與天平際海薰葭色終朝鳧雁聲近
山猶一作全彷彿遠水忽微明更覽諸公作題高知姓名

吳都文粹續集卷三十六